



Број/Број: 03-50-1-60-10-5/10

Сарајево/Sarajevo 09.06.2010. godine

ZAPISNIK

10. sjednice Odbora za žalbe građana Parlamentarne skupštine Bosne i Hercegovine, održane 27.05.2010. godine

Desetu sjednicu Odbora za žalbe građana Parlamentarne skupštine BiH sazvaо je predsjednik Odbora, Mate Miletić.

Sjednici Odbora, u svojstvu članova, prisustvovali su: Amela Bašić – prva zamjenica predsjednika, Borislav Radić – drugi zamjenik predsjednika, Danica Berić, Marijan Milićević i Hamida Karčić - članovi, te Aida Kreho - privremeni sekretar Odbora za žalbe građana Parlamentarne skupštine Bosne i Hercegovine.

Opravdano odsutan bio je Ermin Pešto.

Sjednici su također prisustvovali: Fatima Miletić iz Policijske misije Evropske unije, Rasim Ređo iz Granične policije BiH, Catharina De Lange – Ured visokog predstavnika za Bosnu i Hercegovinu, te Zoran Brkić – Odjel za odnose s javnošću Parlamentarne skupštine BiH.

Sjednica Odbora počela je u 12 sati.

Nakon što je konstatirano da postoji kvorum, predložen je sljedeći

DNEVNI RED

1. Usvajanje zapisnika sa 9. sjednice Odbora za žalbe građana Parlamentarne skupštine Bosne i Hercegovine;
2. Razmatranje materijala Granične policije BiH;
3. Tekuća pitanja.

Dnevni red je jednoglasno usvojen.

Ad.1. Usvajanje zapisnika sa 9. sjednice Odbora za žalbe građana Parlamentarne skupštine Bosne i Hercegovine

Zapisnik sa 9. sjednice Odbora za žalbe *jednoglasno je usvojen.*

Ad.2. Razmatranje materijala Granične policije BiH

Predsjednik Odbora, podsjetio je članove Odbora na podatak da je u periodu od 01. marta 2010. godine do dana održavanja 10. sjednice Odbora, od Granične policije BiH Odboru za žalbe građana dostavljeno šest žalbi građana na rad pripadnika te agencije, te konstatirao da će u narednom period biti neophodno unaprijediti saradnju i precizirati procedure dostavljanja predstavki građana, s ciljem adekvatne provedbe Zakona o nezavisnim i nadzornim tijelima policijske strukture BiH te potpune realizacije obaveza Odbora za žalbe građana definiranih navedenim Zakonom.

Borislav Radić izrazio je nezadovoljstvo realizacijom dogovorenog na sastancima održanim sa predstavnicima Granične policije BiH i Državne agencije za istrage i zaštitu. Naime, od 02. marta 2010. godine, kada je održan navedeni sastanak, do dana održavanja 10. sjednice Odbora, nisu se uspostavili adekvatni mehanizmi dostave predstavki građana Odboru, nije uspostavljena redovna praksa izvještavanja članova Odbora o fazama postupaka koji se vode po predstavkama građana, te nije došlo do usklađivanja internih akata policijskih agencija sa Zakonom o nezavisnim i nadzornim tijelima policijske strukture BiH. Također, iznio je prijedlog da se ponovno održe sastanci sa nadležnim predstavnicima Granične policije BiH i Državne agencije za istrage i zaštitu, te, eventualno, podnese izvještaj Parlamentarnoj skupštini BiH u kojem bi se opisali problemi sa kojima se u radu susreću članovi Odbora za žalbe građana.

Amela Bašić je, kao primjer saradnje kakva bi trebala biti ostvarena između Odbora za žalbe građana i policijskih agencija BiH, u najkraćim crtama, upoznala članove Odbora sa postojećom “dobrom praksom” u smislu načina rada i ostvarivanja saradnje kakva postoji između organa koja se bave sličnim pitanjima na nižim nivoima vlasti u BiH.

Predstavnik Granične policije BiH je, prije svega, izrazio svoje neslaganje sa iznesenim stavovima pojedinih članova Odbora, u smislu da Granična policija BiH ne čini sve sa svoje strane da uspostavi adekvatnu saradnju sa Odborom. Naglasio je da, ukoliko je došlo do kašnjenja sa dostavljanjem predstavki građana, to se isključivo desilo zbog

poštivanja rokova utvrđenih aktima Granične policije BiH za rješavanje po žalbama građana. U cilju prevazilaženja tog problema, predložio je da se održi sastanak predstavnika Granične policije BiH i članova Odbora za žalbe građana, te eventualno predstavnika Državne agencije za istrage i zaštitu, u cilju definiranja jasnih procedura i utvrđivanja rokova za dostavljanje podataka o žalbama građana na rad policijskih službenika tih agencija.

Predsjednik Odbora, Mate Miletić, naglasio je kako smatra da Granična policija BiH svoje dužnosti vrši na najbolji način, te da nema problema po pitanju saradnje između Odbora za žalbe građana i Granične policije BiH. Međutim, istaknuo je i kako bi se postojeća saradnja mogla dodatno unaprijediti, naročito u smislu blagovremenijeg obavještanja članova Odbora za žalbe građana o zaprimljenim predstavkama građana, te pružanju informacija u vezi sa konkretnom predstavkom, kako bi članovi Odbora bili upućeni u sve faze postupka, te kako bi im se omogućilo da poduzmu određene aktivnosti, ukoliko se za to ukaže potreba.

Po okončanju rasprave o ovoj tački Dnevnog reda, predstavnik Granične policije BiH je dostavio članovima Odbora jednu predstavku građanina, te upoznao članove sa pojedinostima slučaja i načinu kako je odlučeno u predmetnom slučaju.

Predsjednik Odbora je, potom, predložio članovima usvajanje sljedećeg zaključka:

ZAKLJUČAK

I

Pozivaju se Granična policija Bosne i Hercegovine i Državna agencija za istrage i zaštitu da pokrenu postupak harmonizacije podzakonskih akata kojima se regulira način postupanja sa žalbama građana na rad policijskih službenika Bosne i Hercegovine u ovim agencijama, sa Zakonom o nezavisnim i nadzornim tijelima policijske strukture Bosne i Hercegovine.

II

Ovaj zaključak dostavit će se Graničnoj policiji Bosne i Hercegovine i Državnoj agenciji za istrage i zaštitu.

Članovi Odbora jednoglasno su prihvatili Zaključak.

Također, Predsjednik Odbora predložio je da se Graničnoj policiji BiH i Državnoj agenciji za istrage i zaštitu uputi dopis u kojem će se zatražiti dostavljanje informacije o broju zaprimljenih predstavki građana na rad pripadnika tih agencija, načinu njihovog rješavanja, te fazama postupka u rješavanju predstavki, za period 01. mart - 01. juni 2010. godine.

Članovi Odbora jednoglasno su prihvatili prijedlog.

Članovi Odbora zaključili su i da je u narednom periodu neophodno održati sastanak sa predstavnicima SIPA-e i Granične policije BiH s ciljem unapređenja međusobne saradnje po pitanju dostavljanja i načina rješavanja predstavki građana.

Ad.3. Tekuća pitanja

a) Vođenje pisanih evidencija o zaprimljenim žalbama građana

Uzimajući u obzir član 15. stav (1) tačku a) Zakona o nezavisnim i nadzornim tijelima policijske strukture BiH, te član 4. stav (1) tačku a) Poslovnika o radu Odbora, u kojima se Odboru, između ostalog, propisuje obaveza evidentiranja žalbi na postupanje policijskih službenika Bosne i Hercegovine, Predsjednik Odbora zadužio je privremenog sekretara Odbora, te članove Odbora Amelu Bašić i Ermina Peštu, da za narednu sjednicu naprave Prijedlog obrasca za evidentiranje primljenih žalbi građana na rad policijskih službenika BiH.

Sjednica Odbora za žalbe građana Parlamentarne skupštine Bosne i Hercegovine završena je u 14.00 sati.

Privremeni sekretar
Odbora za žalbe građana
Aida Kreho

Predsjednik Odbora
za žalbe građana
Mate Miletić